



### TAPAK 3

## BJP züngsemtemi AJP president Gogoi amak

VOL. XVIII NO. 136 (ADOK 136) DIMAPUR



### TAPAK 7

## Shingaiya mapamanguba aser aluyimertem atema mejembir: Tejashwi

TENTONÜ (MONDAY) METSÜREMI (MARCH) 01, 2021 ₹ 5.00

## COVID-19 Nagaland: Taneptsü angur 97.94% kümogo

**Kohima, February 28 (TYO):** Deobarnü Nagaland nung nisung ka dak COVID-19 aliba putetba züngsema nisung ajak agi 12,200 kümogo. Külen, nisung 3 taneptsü anguba ajanga tang anepalur nisung 7 dang kümogo.

"Kohima nung nisung ka dak COVID-19 aliba putet. Maneni, nisung asem taneptsü angu" ta Health & family Welfare Minister, S Pangnyu Phom-i metetdaksü.

Nisung 12,200 rongnungi 11,949 taneptsü nguogo, ta

## NHAI-i ghonda 18 nung kilometer 25.54 lenmang yanglu

**New Delhi, February 28 (Agencies):** National Highway Authority of India (NHAI)-i tawa tu alima otsü tasen ka yanglutetogo.

Iba ya NH 52 nung Vijapur-Solapur tsüingda NHAI-i ghonda 18 nung dang kilometre 25.54 single lane yangluba lir.

Iba osang ya Union Minister for Road Transport and Highways, Nitin Gadkari-i metetdaksü aser kobi melii Limca Book of Records nung zülüoktsü ta paisa ashi.

"Tawa tu National Highway Authority-i Solapur-Vijapur highway nung 4 lane mapamang, ghonda 18 nung dang kilometer 25.54 single lane yanglutetogo. Iba otsü tasen ya Limca Book of Records nung zülüoktsü aser ni NHAI project director, mapamang inyakertem, tanga ketdangsurtem aser company tenü nung inyakertem ajak nem tenüngsang agütsür" ta Nitin Gadkari-i Twitter nung

## COVID-19 Nagaland: Taneptsü angur 97.94% kümogo

**Kohima, February 28 (TYO):** Deobarnü Nagaland nung nisung ka dak COVID-19 aliba putetba züngsema nisung ajak agi 12,200 kümogo. Külen, nisung 3 taneptsü anguba ajanga tang anepalur nisung 7 dang kümogo.

"Kohima nung nisung ka dak COVID-19 aliba putet. Maneni, nisung asem taneptsü angu" ta Health & family Welfare Minister, S Pangnyu Phom-i metetdaksü.

Nisung 12,200 rongnungi 11,949 taneptsü nguogo, ta paisa

## Ao oshi angazukdak ka lapoker

**Dimapur, March 01(TYO):** Tanu nungi tenzuka, talisa, lanurtem nem Ao oshi angazukdaksutsu nukjidong nung, anogo shia Tir Yimiyim tapak 6 nung Ao Oshi ojang kaka tetezu aser oren agutsutsu. Kasaji, tirymiyim Instagram aser Facebook nung angutsu. Iba oshi

paisa ashi.

Nagaland nung COVID-19 nungi taneptsü angubaji 97.94% lir. Nisung 91 asüba nungi parnok 10 bo tanga timtem ajanga asü aser nisung 153 tanga state temi ogo, ta Minister Pangnyu-isa shisem.

Nagaland nung COVID-19 alitsü akok ta temolung meleme bilemba sample 1,30,265 tendangogo. RT-PCR ajanga sample 74,764, TrueNat ajanga sample 37,346 aser Rapid Antigen Test ajanga sample 18,155 tendang.

metetdaksü.

Iba mapamang company nung mapamang inyakertem nisung 500-i shilem agia liasü, ta paisa ashi.

"Kilometer 110 talang Solapur-Vijapur highway ya tang teyangludak lir aser taküm October nung tembangtsü. Iba ya high-density traffic corridor - Bengaluru-Chitradurga-Vijayapura-Solapur-Aurangabad-Dhule-Indore-Gwalior nung shilem ka lir," ta Gadkari-isa ashi.

"Ghonda 18 nung dang kilometer 25.54 lenmang nung asphalt mapamang inyakertetogo. Iba mapamang ano metembang saka parnok kasa mapang tesem pungu nung inyak" ta NHAI ketdangsur kati ashi.

"Solapur, Bijapur nung bypass dena four lane den flyover 6 yangluba ajanga Maharashtra aser Karnataka state tem nung senzusenbongba mapamang kanga ajema akümtsü aser jenjang dalangba asütsü" ta ketdangsurisa ashi.

## Tanü nungi COVID vaccine tanabuba shilem agütsütsü

**Dimapur, February 28 (TYO):** March 1, 2021 nungi arishi küm lemsar COVID-19 vaccine agütsüba maparen tenzütsü ta State Immunization Officer (UIP) Dr. Ritu Thurr-i tanü metetdaksüogo.

Iba telemsa nung January 1, 2021 tashi nung arishi küm 60 ajunger aser temapurtem adentsü.

Maneni, iba telemsa nungsa teküpoklen agüja aliba timtem alirtem aser January 1, 2021 tashi nung arishi küm 45 nungi 59 tashi adentsü.

Vaccine aginürtemi Co-Win App, Arogya Setu App mesüra mobile number amshia cowin.gov.in nung pei sasa tenüng agütsütsü akok. Mobile number kati nisung pezü tashi register sütetsü aser külen session site nunga tenüng agütsütsü akok.

Vaccine agitsüpur ajaki Photo ID (Aadhar, Electoral Photo Identity card, Employment certificate, Official ID card, driving license, PAN card etc.) abentsüla.

Arishi küm 45 nungi 59 nung alirtemi Photo ID den külemi Registered Medical Practitioner kati agütsüba certificate agütsütsüla.

Vaccine agitsüpur ajaki mask enoktsüla, kishi nung mozü agi teka merütsü aser nisung o nisung tsüingda 2-meter tepila ayutsüla.

Sorkar mozü ki ajak nung vaccine angati agütsütsü. Tang shimteta aliba session sites den ano talila bendenloktü, ta Dr Ritu Thurr-i metetdaksüogo.

Maneni, mezüngbuba shilem nung vaccine magii aliba Healthcare aser frontline workers nem session sites ajak nung vaccine agütsütsü ta paisa ashi.

*Teküpoklen agüja aliba session sites nung anepdang 9:00 ako nungi nikongdang 5:00 ako tashi vaccine agütsütsü:*

### District VENUE FOR VACCINATION

Dimapur	District Hospital
Kohima	NHAK
Mokokchung	District Hospital
Mon	District Hospital
Phek	District Hospital
Zunheboto	District Hospital
Tuensang	District Hospital
Wokha	UPHC, Wokha Town
Peren	CHC, Jalukie
Kiphire	District Hospital
Longleng	District Hospital

*Arishi küm 45 nungi 59 atema tsünglanglen agüja aliba tashidaktem agizütsü:*

### Sl.No. Criterion

- Heart Failure with hospital admission in past one year
- Post Cardiac Transplant/Left Ventricular Assist Device (LVAD)
- Significant Left ventricular systolic dysfunction (LVEF <40%)
- Moderate or Severe Valvular Heart Disease
- Congenital heart disease with severe PAH or Idiopathic PAH
- Coronary Artery Disease with past CABG/PTCA/MI AND Hypertension/Diabetes on treatment
- Angina AND Hypertension/Diabetes on treatment
- CT/MRI documented stroke AND Hypertension/Diabetes on treatment
- Pulmonary artery hypertension AND Hypertension/Diabetes on treatment
- Diabetes (> 10 years OR with complications) AND Hypertension on treatment
- Kidney/ Liver/ Hematopoietic stem cell transplant: Recipient/On wait-list
- End Stage Kidney Disease on hemodialysis/ CAPD
- Current prolonged use of oral corticosteroids/ immunosuppressant medications
- Decompensated cirrhosis
- Severe respiratory disease with hospitalizations in last two years/ FEV1 <50%
- Lymphoma/ Leukaemia/ Myeloma
- Diagnosis of any solid cancer on or after 1st July 2020 OR currently on any cancer therapy
- Sickle Cell Disease/ Bone marrow failure/ Aplastic Anemia/ Thalassemia Major
- Primary Immunodeficiency Diseases/ HIV infection
- Persons with disabilities due to Intellectual disabilities/ Muscular Dystrophy/ Acid attack with involvement of respiratory system/ Persons with disabilities having high support needs/ Multiple disabilities including deaf-blindness

## BJP Mkg district ketdangpurtemi jangjashitsür

**Dimapur, February 28 (TYO):** February 26, 2021 nü 'show cause' notice agütsüba atema BJP Mokokchung district ketdangpur 6-i tanü Media Cell, BJP Mokokchung sangdong ka ajanga jangjashitsüogo.

"Onok district ketdangpurtemi shingaiya anema tebilemba tamajung mali. BJP Nagaland state president Imna Along Longkumer melenba ajanga district nung BJP maparen tajungba inyakertetsü ta asüba tangatetba dang lir" ta BJP Mokokchung District nung Vice President, Nukshi I. Ozukum, Vice President T. Nukshi Jamir, Vice President Watitemsu, Secretary Lanuyanger Longkumer, Secretary Tekanungla aser Secretary Alepla Chang nungertem sign asüba sangdong nung ashi.

"February 22 nü senden amendang BJP Mokokchung district President Imolemba Jamir, General Secretary S. Moa Imsong aser district secretary Lanutoshi nungertem liasü aser idangji state president melentsü onük atema mapang talangka jembio," ta parnokisa ashi.

Iba tebilemstü onük ya 2020 nungi jembia arur aser iba ajanga BJP Mokokchung district inyakim nunga tetsükdaksü ajurur. Iba jagi state BJP president melentsü molunger district ketdangpurtemi tenüng agütsütsü ashiba ama onoki tenüng agütsü, ta sangdong nungsa metetdaksüogo.

"February 22 BJP district office senden nung iba tebilemstü kanga junga jembir sernung BJP Mokokchung district-i 'show cause'

notice agütsüba atema aoksar. Talisa, onoki BJP Nagaland In-charge dangi shidi züluba nung kuli tejangja agütsüogo. Anungji, onok 6-i ashibaji February 22 senden nung jembitepba ama lir," ta district ketdangpurtemisa ashi.

"State assembly election agitsü yakta agitsü lir aser iba jagi Mokokchung district nung BJP-i election atema renema atatsü atema onoki iba telemtetba agi. February 26 nü rongdak senden ayonga amendang onok dang kuli asüngdangtsü melena takdang toktsür aotsü ang ashidang onok kanga aoksaogo. Anungji, iba sangdong ajanga onoki telemtetba agibaji BJP Mokokchung district ketdangpur ajaki meteta agiba liasü ta jangjashitsür," ta parnokisa sangdong nung ashi.

## NCF Dibrugarh Hon Jubilee amongtsü atema renemer

**Dimapur, February 28 (TYO):** Taküm October ita Naga Christian Fellowship (NCF), Dibrugarh indang Hon Jubilee amongtsü.

Iba dak sendakba nung Golden Jubilee Magazine Committee, NCF, Dibrugarh-i February 27 & 28 anogotem

Kohima aser Dimapur nung alumni züngsemtem den ajurutepa sendentem menogo.

Kohima nung senden amendang Urban Development & Municipal Affairs Advisor Dr. Neikesalie Nicky Kire, Retd. Principal Director, Health & Family

Welfare Dr. Neiphi Kire, Dr. Seyiekietuo Angami, Dr. Niketuo Kiso, Dr. L. Votso Angami, Dr. Ditsülo Mero aser Dr. LR Kire nung er aden. Maneni, Hotel Saramati, Dimapur nung senden amendang Dr. Limaakum Jamir, Retd Medical Director aden.

## Wezope Kenye nem tenüngsang agütsüba sentong ka agi



Kohima nung February 27, 2021 nü Wezope Kenye nem tenüngsang agütsüba sentong ka agiba mapang SAGF ketdangsürtem den tangokba noksa ka yangi angur.

**Kohima, Tsüklai/February 28 (TYO):** Secretary Health & Family Welfare Department, Nagaland, Wezope Kenye IAS ya Indian Administrative Service nung züngokba asoshi Secheku Area Graduates' Fellowship (SAGF) ajanga tenüngsang agütsüba sentong ka ayongzüka nung jembiba mapang, "Lanuwa nungi ni yimtsing nung menden, desk mesüra notebook aser pen mali school zünga intet. Class agiba shia longpak ka den chalk ka amer lesson angazüka liasü. Tsüngrem ya taochi agi sünga lir aser kinunger aser kin sanger teyari ajanga tanü ni iba jenjang tongtet," ta Wezope Kenye IAS-i ashi.

Wezope Kenye IAS nem tenüngsang agütsüba sentong ya Chakhesang Baptist Church Kohima nung February 27 nü agia liasü.

Kenye-i pa takum otsü lemsatep aser par putu nung ama masü tanü putu nungbo nüburtemi nungdakba ajak peria angur, ki-o-jen aser tesendaktep tajungba nguteter, anungji tajung asoshi itemji amshitsüla, ta ashi.

Pai lanurtem dang tera junga

yangier mangdang yur pei jangraba inyakba mapang tasü ita ochi shia lira wadang balala nung takok ngutettsü, ta ayongzüka.

Iba sentong nung Zachive Thele, Rtd Additional Secretary to Government of Nagaland aser Colo Mero, convenor, Advisory Board SAGF natia salem o jembi aser ajak nung Tsüngrem mezüng südakja Pa sentong nung aotsü ayongzüka liasü.

Asenok tetoktepba agi sünga aliba lima ka nung alir, anungji lanurtemi life skills renlokba nung rangloksüla aser takum alitsü asoshi ochishia inyaktsüla, ta Mero-i ashi.

Asen kechi jenjang nung lidir liaka asenok ajaki dangar dang meimba, aria bilemba, ochishiba, tajung atema nendaka agütsüba aser lokti asoshi tajung inyaka nübur ajungmesoba yimyatem angazüksüla, ta pai ashi.

Fellowship tenüng nung SAGF tir Dr. Zavise Rume-i jembiba mapang Secheku area nungi mezüngbuba IAS cadre nung aniokba atema Wezope Kenye nem tenüngsang agütsü.

Pa IAS cadre nung aniokba ajanga Chakhesang nüburtem aser talisa Secheku area nung alirtemi IAS officer ka mapang talangka nungi aginüa mangdang atalokogo aser iba takok ya lanurtem IAS officer tali akumtsü asoshi mera tetetzüker südaktsüla, ta Dr. Rume-i ashi.

Wezope Kenye-i bendanga agütsür meranga aser nendaka inyakba asoshi Dr. Rume-i pelaba lemsatep, koba ajanga pai Indian Administrative Service jenjang tongteta liasü.

Paisa sentong nung adener Fellowship pur dang tazüng-tashir den sensaksem kaa resources lemsateptsü aser wadang balala nung kati ka ajungshitsü ayongzüka liasü.

Iba sentong nung CBCK indang senior pastor, Rev. Dr. Kevekhalo Lasuh-i Wezope Kenye aser par kibong moaja sarasadema liasü.

Iba sentong nung SAGF press and media secretary, Khrolhiweu Tsuhah menden liasü aser SAGF general secretary, Dingupe Lasuh ajanga tarur pela agizükba o jembi.

## LBA nung Liangmai Baptist Church Nkwarew affiliate süogo



Liangmai Baptist Association nung züngsem akumba sentong ka February 28, 2021 nü agiba mapang Nkwarew Baptist Church choir temi temeja ken ka atenba noksa nung angur.

**Dimapur, Tsüklai/February 28 (TYO):** Liangmai Baptist Church Nkwarew pur affiliation sentong ka Liangmai Baptist Association (LBA) ajanga February 28, 2021 nü Peren District kübok Nkwarew Baptist Church nung ayongzüka liasü.

LBA nung züngsem akumba maparen ya LBA indang Executive Secretary, Rev. Kitanwi Chawang-i ketdangsüa agia liasü.

Iba sentong nung jembiba mapang Rev. Kitanwi Chawang-

i ashiba agi, Nkwarew Baptist Church ya LBA nung arogo tanubusang süaka tanüla tsütsü tain lir, koba 2014 küm tenzüka küm tenet tashi aruba mapang arogo nung züngsem 230 lir.

Tanüla tsütsü tsükchirtemi timtem agütsütsü mejangjai aliba tensa ka nung asenok alir, anungji arogopuri Tsüngrem dak rangloka alitsüla, ta pai ashi.

Temenen aridoktsü, shiranger aneptsütsü, asür shia arudaktsütsü aser osangtajung prokshitsü asoshi Yisu-i

tamangertem nem tashi agütsüogo, anungji Nkwarew arogo tamang nung jajatsüla aser Tsüngrem yimli ulushitsüla, ta paisa ashi.

Rev. Kitanwi Chawang-i arogo züngsem tassenba dang ajemalua shisa kaa Tsüngrem tenzüksü ajungshia liasü. Yisui par arogo longma nung yangertsü ashiba ama arogo ya tanüla indaktsüba arogo ka asütsüla aser timtem ajak ajangettsü asoshi Tsüngrem den jajatsüla, ta pai ashi.

## Nagaland nung World Consumer Rights Day amungtsü

**Dimapur, Tsüklai/February 28 (TYO):** Küm shia March 15 ya World Consumer Rights Day ama alima tesem ajunga nung amunger, aser Nagaland Voluntary Consumers' Organisation (NVCO) ajanga Nagaland nunga World Consumer Rights Day ya hopta ana (March 2 - March 15, 2021) amungtsü, ta Nagaland Voluntary Consumers' Organisation tir aser National Award for Consumer Protection sempet angusang Kezhokhoto Savi-i sangdong ka ajanga ashi.

Consumer International ya 1960 küm April 1 nü tenzüka koba alima tesem balala nungi consumer telok tem züngsem lir. Iba tentet nung linük 120 nungi züngsem telok 250 lir.

Consumer International indang nükjidong ya consumer wazüka aser kumzüka ayutsü lir aser iba tentet indang office ya London, England nung amenoka lir aser regional office tem Latin America, Asia Pacific, Middle East aser Africa nung lir.

Taoba mapang Consumer International dang International Organisation of Consumers Union (IOCU) ta nungja agüja liasü, koba Elizabeth Schadee ajanga tentet.

Ajisüaka World Consumer Rights Day yabo taoba US Tir John F Kennedy ajanga ajungmesor tentetba lir.

1962 küm March 15 nü Tir John F Kennedy-i consumer temeden indang jembishinütsü asoshi US Congress dangi shidi temeja ya yoka liasü. Iba sülen 1985 küm April ita United Nations ajanga consumer protection indang yimyatem aser ozüngtem agizüka liasü. 1983 küm World Consumer Rights Day ya munga liasü.

Iba sülen World Consumer Rights Day ya küm shia March 15 nü mungyonga arur. Indian parliament nung kasa Bill ya

agizük aser India tiri December 24 nü temelaba agüja Consumer Protection Act, 1986 ya mapa kuma inyaka aser amshia arur.

Iba Act nung aliba inyakyim ya aiben melenshia arur saka tang atemabo Consumer Protection Act, 1986 ya Consumer Protection Act, 2019 agi melenogo.

India nung World Consumer Rights Day ya Consumer Protection Act, 2019 nung ajemdaker taküm mezüngbuba amungtsü lir. Aser iba dak sendakba nung Nagaland Voluntary Consumers' Organisation ajanga state sorkar dang Nagaland nung Consumer Protection Act, 2019 mapa kuma amshitsü asoshi tekeratiba nung temzüng-ozüng yanglutsü nenshia ashir, ta sangdong ajanga ashi.

World Consumer Rights Day 2021 ya "Tackling Plastic Pollution" omen nung ajemdaker amungtsü, ta International Consumer ajanga sangdongogo, ta NVCO tir Savi-i ashi.

Iba anogomung ya ajanga alima tesem ajungalen nüburtemi tzü-mopung kumzüka ayutsü aser ajungkettsü asoshi yimya sübatsü. Taküm iba anogomung indang omen "Tackling Plastic Pollution" ya asen state aser talisa Kohima aser Dimapur asoshi kanga tapet aser tongtipang lir, anungji lokti tentet balala, sorkar department, arogo, tribal hoho temi pei akokba nung asen alidak plastic agi tzü-mopung menentsüba anema lungjemer raratsü ajungshir, ta Savi-i ashi.

Kasa mapang paisa district/sub-division level consumer voluntary organizations dang iba sentong nung ajemdaker plastic amshiba ajemtsü aser asen meketa aliba ajunga wazüka ayutsü aser ajungkettsü ayongzüka liasü.



Dimapur Municipal Council ajanga Breeze Restaurant, Nyamo Lotha Road tesülen aliba colony nung nokdanga aliba kilentzü lenmang lapokja liasü. Ita aika iba ayonger nung jana-reja atsüngdena arrsanga lapoktsüba asoshi Breeze Restaurant tesülen Rajbari Area nung alirtemi Dimapur Municipal Council dang pelaba lemsatep. Taoba mapang iba tesem nung alirtemi CEO, Dimapur Municipal Council dangi parnok timtem shia shidi zülua liasü aser yamaji DMC ajanga anogo asem tashi iba ayonger nungi jana-reja indoka müreksü.



Abelen nungi Lakhimi Baruah aser Jadav Payeng noksa nung angur. Jorhat district administration-i Assembly election 2021 atema Padma Shri Jadav Payeng aser Padma Shri Lakhimi Baruah na Systematic Voters Education and Electoral Participation (SVEEP) indang icon asütsü shimogo. March 27 nü Assam Assembly election mezüngbuba shilem nung Jorhat district nung polling asütsü. Padma Shri Jadev Payeng dang 'Forest man of India' ta ajar aser külen Padma Shri Lakhimi Baruah ya Jorhat nung amenoka aliba Kanaklata Mahila Urban Cooperative Bank general manager lir. Jorhat election district nung women polling 60 lir aser model polling station 15 dena lir. (Jorhat, February 28)

### Guwahati nung vote enoktsür nisung tasen 50,000 lir

**Guwahati, February 28 (Agencies):** Aruya aliba Assam Legislative Assembly election nung Kamrup (Metro) district nung vote enoktsür nisung tasen 50,000 dak temai pei nem agütsüba temeten amshia vote enoktsütsü.

Kasa mapang arishi küm 80 dak tema tain voter 19,105 aser matamabensar voter 2,500 dak temai tan aruya aliba election nung vote agütsütsü, ta Guwahati nung Kamrup (Metro) DC Biswajit Pegu-i osangbener dang ashi.

Tebur voter 5, 64,086, tetsür voter 5,73,248 aser transgender voter 42 densema elector 11, 37,376 agi iba District kübok polling station 1,707 nung vote agütsütsü.

Kmarup (M) district nung Assembly constituency 4 - 51-Jalukbari, 52-Dispur, 53-East Gauhati aser 54-West Gauhati

dena lir. DC Pegu-isa ashiba agi, tang alima ajunga asüngba COVID-19 wara süshia maoba dak sendakba nung, polling station tongtibang nung voter tem adenshiba ajemdatsütsü atema polling station talila amenoktsü asoshi mera agiogo.

COVID-19 temzüng agi melaba ama polling station ka nung timba agia voter 1,000 dang melatsü.

"Item polling station talila ya tang lapoka aliba polling station tongtibangtem indang shilem asütsü. Matamabensar, arishi küm 80 dak tema aser COVID-19 agi shirangertem atema postal ballot achaayangtsütsü," ta Pegu-i ashi.

Iba election achaayanga agitsü atema district administration-i ketdangsur 6,000 dak tema anepalutsü.

DC Pegu-isa ashiba agi,

District nung aruya aliba Election atema tetsürtem asoshi mejameja polling station 125 lapoktsütsü.

Ano külen district administration-isa 51-Jalukbari aser 52-Dispur LACs nung polling station pungongo; aser 53-East Gauhati aser 54-West Gauhati LACs nung polling station pezüzü densema model polling station 18 amenoktsü terenemba lir.

Kamrup (Metro) district nungsa critical polling station 57, shadow polling station 7 aser vulnerable polling station 5 lapoktsütsü.

Election indang tzüzüng oziung (model code of conduct) mapatong timi achaayangtsü atema, district administration-i LAC shia nung flying squad team 3, video surveillance team 3, static surveillance team 3 aser video viewing team 3 yoktsü.

### Tanü nungi Meghalaya nung school lapoktsü

**Shillong, February 28 (Agencies):** Meghalaya state nung March 1, 2021 (Hombarnü) nungi Kindergarten densema class ajak atema school lapoktsü State sorkari temelaba agütsüogo.

Education department-i sangdong ka ajanga ashiba agi, kaketshir ajak class nung adentsüla ta tetuyuba balaka mali aser tsürabur tetuyuba nung kaketshirtem class nung adentsü

akok. School ketdangsurtem dang offline ajanga tesayuba mesüra online class tem agitsü asoshi temelaba agütsüogo, ta sangdong nungsa shia lir.

Shisaliok rejutem melapokdang, school management committee temi district health ketdangsurtem aser local community densema tsüraburtem aser külem

sendaktepa alirtem den jembiteptsüla.

COVID-19 putetba osang kar danga lira health bangdakpurtem den jembitepba sülen school shibangtsütsü asoshi tashi agütsüogo.

Tesüiba ita 10 tejakdang tsüingda iba tesashi wara ajanga Manipur State nung nisung 13,961 dak kongshi aser nisung 148 taküm samaogo.

### Assam Congress-i aniba Grand Alliance tuluba akümer Hagrama Mohilary-i Himanta Biswa Sarma aitsür

**Guwahati, February 28 (Agencies):** Bodo People's Front (BPF)-i Deobarnü Guwahati nung Assam Congress-i aniba Grand Alliance nung denogo.

Honibarnü BPF mendenbuba Hagrama Mohilary-i BJP den tesentaktep pilatsü aser Grand Alliance nung adentsü telemtetba agiba osang metetdakja liasü.

Grand Alliance nung adenba mapang Hagrama Mohilary-i Assam Minister Himanta Biswa Sarma aitsü.

2020 BTC elections result adokba sülen Himanta Biswa Sarma-i nisungtem sen agi alizük, ta Mohilary-i aitsü.

"Onoki Himanta Biswa Sarma inyakyim benshia sorkar akümtsü memolunger" ta paisa ashi.

Taruba assembly election nung Grand Alliance-i menden timba nung takok angutsü aser Assam nung taruba sorkar akümtsü ta Mohilary-isa ashi.

"Grand Alliance-i menden 100 tema nung takok angutsü nüngdak madoker. Menden 64 nung dang takok ngura sorkar akümtsü akoker anungji menden 70 takok ngura, aji teperrri" ta pai metetdaksü.

Deobarnü BPF-i Grand Alliance nung adenba dena tang tashi nung telok 7-i iba teloktep nung denogo.

### Manipur college tesayurtem anogo 29 buba lungkak aiter



**Imphal, February 28 (Agencies):** Manipur nung college tesayurtemi 7th Pay Commission agi melaba mapa inyaksü takhangba agüja lungkak aitiba tenzüker anogo 29 buba jungogo.

Federation of Government College Teachers' Association (FEGOCTA), Manipur züngsemtemi taküm January 28 nungi 'cease-work strike' ta ser lungkak aita arur.

Brihostibarnü Manipur sorkari 7th UGC pay scale mapa küma inyaksü atema tetuyuba ka agütsüogo aser college tesayurtem dang lungkak aitiba maparen anentsü

mepishiogo. Ajisüaka, iba tetuyuba ya 'mabensa' ta shia tesayurtemi lungkak aitiba manentsü ta ashir.

Honibarnü FEGOCTA-i iba tetuyuba ya khenyongi dang magizüketla ta ashi aser maneni lungkak aittsü telemtetba agi.

Hokolbarnü senden ka amendang tesayurtemi maneni lungkak aittsü asoshi telemtetba agiogo, ta FEGOCTA-i metetdaksü.

"August 6, 2020 nü Cabinet-i temelaba agütsüba ama tetuyubatem magütsü tashi onoki mapai moi lungkak aittsü" ta FEGOCTA-isa shiogo.

### BJP züngsemtemi AJP president Gogoi amak

**Guwahati, February 28 (Agencies):** BJP züngsemtemi Assam Jatiya Parishad (AJP) president Lurin Jyoti Gogoi amak.

Nalbari district kübok Baghjani nung iba ya atalok aser iba tesem ya Barkhetri Assembly constituency kübok lir.

Barkhetri Assembly constituency nungi tang BJP lennir Narayan Deka-i MLA inyaker.

BJP züngsemtemi Lurin Jyoti Gogoi indang convoy anendaksü aser longbanger amak.

Upar Borbhag panchayat president Mintu Kalita-i anir

BJP züngsemtemi Gogoi amak. "BJP-i iba ama mapa inyakba atema süngmanga mebilemer. BJP-i iba ama mapa inyaker aser iba ya ozüngi memelar" ta Gogoi-i ashi.

Paisa Election Commission dang iba tatalokba atema mapa inyaksü ayongzükogo.

"Tarutsü nung iba ama ya mataloktsüla aser election timi agitsüla" ta Lurin Jyoti Gogoi-i ashi.

Iba tatalokba indang video aser noksatem nung BJP züngsemtemi party wako amer amakba sayur.

Külen, AJP ketdangsurtemi tir Lurin Jyoti Gogoi amakba aitsüogo.



Honibar nikongdang mejangjaba nisung kari Sikkim Chief Minister PS Tamang indang official Facebook page nung tim mesüi teka ai. Iba page ajanga CM PS Tamang-i sorkar osangtem prokshir aser yashi nikongdang 5:00 ako meta hack asüba sülen aonung 9:00 ako meta page nung tetsür noksa ka enoker lapok. Ketdangsurtemi Deobarnep ang iba CM indang page azuoktet aser Sikkim Police-i ken o ka benoka bushisüngdang tenzükogo. (Gangtok, February 28)



## TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 01, 2021

### MAPA RENEMA INYAKER

**K**echi mapa südörösüka tenzüksüba kanga tongtibang saka tenzüka dang nungi renemtetbajisa tongtibangba lir. Iba jagi kechisa junga tembangtetter, mapa ajakji tajung ta shin o nunga ashir. Tetezü, mapa tera menur mesüra mejungi mesüra timtema tenzüksüa akok saka mapang shitak nung junga tembangtetra, tagitsübo aji dang asütsü. Kasaji asen taküma tetenzüklen mejungi liaka tatem nungbo taküm junga lia tembangra, ajak tajung asütsü. Ibaji kodang asenoki Nagaland nung government-i inyakba mapatem den medemdangdir, tesasatsüka mapa teimbaka tajung aser tuluka tenzüksü saka terenemba anogobo maka toktsüba angur. Ibayongji, Nagaland nung nübortem ajangzüksüba mapa tulu aser tajung aika merenemtet akoksadagi. Atangji, asen lima tensa mapang aser nisungtem mulungsentsü majung asünungji, mapa inyaker tema aiben tetsübu aser takoksa tia ajurua alitsüa akok, iba jagi balaka mapang shitak nung mapa shitak renemtsüba mapatema merenemtet timtema alitsü. Ajisüka, alima tensa mapang majungba ya asen lima nung dang masü saka alima yimya asünungji ajaklen lir, saka asenoking merenemtetter dang ashi, tangaribo mapa ajak tenzüka ama renemtetter. Ibaji kodang bilemdangdir, asenoki nübortem asoshi mapa tulu tenzüker merenemtetba ya alima tensa tia dak kisung atongtsüla masü saka asenok dak asen lima aser nübortem meimba shisatsü maliba ajanga nübortem asoshi inyakba mapatem temulung agüja meinyakba repringtetter. Aji oda, kodang asenoki yimkong ajangzüksü bilema masü saka asen kija ajangzüksü bilema inyakdir, yimkong mapajibo kodanga merenemtsü aser renemtet nunga mashimashika, tilaba aser tamajungba ka dang renemtettsü. Iba jakla dener nübortem asoshi inyakba agi kar kanga takar akümdang asen lima aser nübortembo kanga timtemdaksür. Iba jaklaji asenok dak nungi meindokra, tang Nagaland nung Medical College ana lapoktsü atema kiojen yanglutsü mapa tenzüka aliba yaa merenemtettsü. Yakanü center government nungi Union Health minister, Dr. Harsh Vardhan arua Kohima nung Nagaland Medical College yangluba mapa tonga orr repringdang, iba mapaji kanga menua merenemtetter ta mepelai ashiba o ji asenok asoshi center government tsungdang nümedangtettsüba o ka lir. Aji oda, Union Health minister-isa Mon nung Medical College ka tenzüksü asoshi long azünga toktsüba mapajia asenoki mapang shitak nung renemer Medical College-ji lapoktettsü asü masü ta kanga temulung melemer. Atangji, takdang nung mena yur asen lenirtem aser mapa inyaker tema dak temulung malem bilemetsüba tim masü saka tang tashi nung inyaka aruba tongtibang mapatem aika merenemtet sen jenjang dang tuli, mapabo anenli ta angudang ma ta temulung malemetsüba adoker. Tanü iba yimobilem lemsatepba nükjidong ya, tang nungibo kechi mapa inyakdir, mapang shitak nung mapa shitak renemdaktsünüba agi lemsateper. Joko, Nagaland tajungba kuma yanglushitsü atema tang nungibo mapa shitak renemtetta inyaker tema dang nungdaker. Iba taginüba nükjidong atongtsü atema, atangji, inyaker tema dang masü saka asenok nübortemia temulung agüja repringtsüla, kechiyong mapaji asenok meyong, asenok kibur, asenok atema inyaksür. Aji oda, kechi mapasa nübortem asoshi inyaksür, item mapa indangji nübortemi junga metettsü tim. Joko, tanü putu nungbo senso shiaji temetetter (informed citizen) ka mesüra ketdangser aser mapa inyaker tema ashioksütsü aser temetetter süra akümtsüba shitak inyaksütsü. Temeteter senso kaji tazungba degree akaba dang ashir masü saka pei temeten metetba aser pei alidak yimkong asoshi inyaksütsüsa government ket nung kechi sentongsa lir, sen kwi jenjang koma inyaksüla, mapang kopiga agitsü aser kechisa akatsü nungdak, item ajakji asungdangtepa metetba nisungji temetetter lir. Item jagi pei nübortem ajangzüksüsa mapa tulu inyaksütettsü. Item temetettertem jagi mapa inyaker tema ajungshia mapang shitak nung mapa shitak renemdaktsütettsü. Iba jagi nübortem tuluka ajangzüksü.

## OLEMSABANG

### HORNBILL FESTIVAL - SHIBA AJANGZÜKER?

~ Wati Longchar (Serampore)

(Yashi adok nungi...)

d) Tanü putu oset-ts?set ka amai dang meimchir shishilembateper. Taoba putu, temesung nungeri tanak nisung bazar nung bener oa alar asütsü ayokba ama, tanüa küm shia 6,00,000 - 8,00,000 pur oa mesüra tiyazü, mapa agütsütsü, ta mesüzüka anir oa ayoker ta ashir; khen khenbo sentsüh yong tsüraburi ayokba lir. Item rongnung 70% shi tetsür, talisa aiür chanutem. Parnok alar dang nungi tamajungba shibanga ayur aser bazar oset ama, iba tetsür gonda paika asoshi iba jenjang ta ayokba; ano alima kar nungbo ita trok, küm ka asoshi kibong kümdaktsüba (contract marriage) aser karbo makamait ajanga pei temang ayokba jenti adoker. Opai mali, mapa makar pei temang ayoktsü. Ibai temelatiba sen anguba shishilembaba mapa ka anungji lanur taküm aika raksatsü. Anungji commercial tourism aser sex industry ana ya sentaktepa lir. Tazüokba mali, shi-azü jangratem inyakba ajanga HIV prokshiba aser AIDS agi nisung aika anojungi asüba osang ngugo. Chiyungtsü peria mungutetra, mapa makara ibala japujari mapa inyaksü. Takar ishika asoshi asen jala, asen chirnur ayoktsü asü, kümzüka ayutsü, education agütsütsü?

e) Kobala mapasa tourism ajanga nüburtem (lisopur) nem bener arutsür? Siem Reap nung (Cambodia) 12th century nung yangluba Angkor Wat ta sür Buddhist temple ka lir. Meimchiri yamai tekülem ki yangluteter no ta tanü tashi alimai süngmanger. Iba temple repringtsü tourist aika arur. Siem Reap nung hotel, restaurant, bus, gari, supermarket aika lir, saka item ajakji Korea nunger indang amai dang angu. Korea nungi tayimtsü anogo shia anana arur aser Korea nunger yimti ka amai Korea oshi nung sign board lir, aser Cambodia nunger aikati Korea oshi jembir. Korea nunger aika aruba jagi Cambodia nunger mapa kobala angur? Rongsen bushiba maparen koma renloker? Korea nunger tourist ajak Korea nunger tayimtsü nung arutsü (Cambodia nunger tayimtsü kata Koreai maor), Korea nunger gari, bus nung senzütsü, Korea nunger hotel nung anentsü aser chiyungtsü. Angazükba agi Angkor Wat-ji Tourism minister den som sür Korea nunger kati achaayanger ta ashi. Tetezü, Korea nunger aruba tajangzük mali, sen ajak parnok dangisa meyipa oadoker. Rikshaw nung tourist anir senzüba, temang nemshitsüba (massage sütsüba), ku mejemtsüba, ola-angla mapa kar ayokba dak alaka tajangzük kecha mali. Kobala mapa angur? seasonal mapa, tetezü tourist arudang inyaksü, marura ita sen mali, mapaa mali. Chowkidar, naro anebalur, shidok-shirar, hotel nung awazür mapa dak alaka mapa tulu magütsür. Cambodia nunger aser Korea nunger rongsen maparen nung tepila uluraba ajanga, lisopur pei lima nung tangar kübok alitsüsa aküm. NE country pungui (India dena trok) mekütpanga lir ta pelateper, saka asenok rongsen maparen nung tangar den tepila tulu ali nungji Cambodia nunger jenjangi aitsü ana nung dang lir. China nunger company ka dang aru nung ola madoktettsü. Tanü Myanmar nung armyi coup sütetbaji China nunger company teyari ajanga ta aikati ola adokba azünger. Mekümdangra, lisopur pei lima kilir akümtsü. Süra takar ishika tajangzük asoshi tourism promote asütsü asü, lisopur aser sensaker terenlok asoshi inyaksü?

f) Alu ayimtsü jaka tajung aika airport yangluba, lenmang ulushia yangluba, park balala, golf course, horse riding, hotel yanglua aoba ajanga agiadoker. Itemji shirnok atema? Takar atema. Sensaker shiba golf asayaa kazür? Ball shima aser ajok apur senzürtemji sensaker. Hotel temeküt ayong, tzüyiküm anasa jana-rüja, plastic, bottle amalai menentsüba agi shiruru asür aser tzü alia ajemtsüsa akümer. Bangkok nung hotel nungi condom mashi mashi indokba agi ayong ajanga menentsüba ajanga kibur apuba osang adokogo. Takari bottle nung aliba tzü dang alia ajemer, saka sensakeri kodaser tzü alitsü? Tzüyiküm anasa hotel kiburi ango aputsü memelar, tourist tzü chikodaktsütsü aser ango ajidaktsütsü asoshi, saka angopur mapa mali kümdaktsür, aser angupor kibong aika aoso mekümdaka ayutsüsa akümer. Ano tourist pelaa anü wanga tzüyiküm nung mejanga kazüdaktsütsü asoshi tzüyiküm anasa aliba süngdonglidong ajak lepdoker merük merüka ayur. Ashiba agi, 2005 nung Indian ocean nung tsunami adokdang tzüyiküm nung süngdonglidong melepdoki ali ka asübo, teraksa patigato madoktsüla ta shiteter. Alima nung 4-7% mopung menena kümdaktsübaji tayimtsü ajanga ta ashir; tzüyim nung rong tulu ka aoba agi gari 12,000 shii mopung menentsüba den saku ta ashir. Item ajakji tourist takar ishika shi jangratem asoshi inyaker. Shiba asoshi tourism development? Lisopur aser sensaker, aser Tsüngremi yangluba wazüka ayutsü asü, shi-azü jangratem bushir tourist ishika atema alitsü?

g) Sen atema pei culture akhüm metsübu ayoktsü. Taiwan nung medemer ka, Turuku nunger, den cultural performance repringi ao. Kodang Turuku nungeri tsüngsangtsü ta ashi, pa kanga pelaa kü dang rasaa ashitsü tejangraba nung ataa liasü. Saka pa ola madoki aküm. Kechiba rasaa mashir ta asungdang nung, pai süoshi dang Turuku nunger süoshi ashi, tsüngsangbaji kecha tetezü mali. Tourist peladaktsütsü style tsüngsang ka dang ta langzü. Yar-tsüngsang, ken-ten menü ajak tetezü ka lir, saka tangar shi jangratem atalokdaktsütsüba aser sen ajangzüksü asoshi pei sobaliba ayoker. Ya metetdi: "Traditionally, indigenous customs, rituals, sacred shrines, places of worship, sacred music, and ceremonial dress were held with much reverence. Today they are commercialized for tourists' advantage. Musicians, dancers and other artists perform, exhibit and sell their creativity to earn some income at the cost of their self-respect. Today indigenous sacred music and dances have turned into mere cabaret performances for enjoyment." Ashiko, hornbill festival nunga pei sobaliba akhüm metsübu oset-set ka amai yokya alitsü! Sobaliba ya tayoktsü oset ka asü masü? Hornbill festival ajanga dang pei sobaliba wazüka yutet asü, tanga maparen ajanga wazüka ayutsü? Sen tajangzük asoshi sobaliba ayoktsü asü, tetezü keta amshitsü?

(Maneni asung adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Amnesty Intl.-i Pakistan nunger Khristan apuani chioktsü akhanger



Pakistan nunger Khristan apuani Shagufta Kausar aser Shafqat Emmanuel na noksa nung angur. Pakistan nung Tsüngrem mezüngmeshiba ozüng kübok Khristan apuani na aitsür tena nem tasüba obendang agüja 2013 küm nungi tang tashi tena tepuokdak lir.

**February 28, 2021:** Amnesty International-i Pakistan sorkar dang, linük nung Tsüngrem atalaba ozüng kübok Pakistan nunger Khristan apuani na nem tasüba obendang agütsür 2013 küm nungi tang tashi tepuokdak ayuba ya tim masü, anungji tenaprongla chiokang, ta takhangba agütsüogo.

Tsüngrem mezüngmeshiba text messages yok, ta aija Khristan apuani na 2013 küm nungi tang tashi tepuokdak yua lir.

Khristan apuani Shagufta Kausar aser Shafqat Emmanuel nati Pakistan nung Tsüngrem mezüngmeshiba ozüng alema inyakogo; 2013 küm tenati Muslim nunger putir ka dangi Tsüngrem mezüngmeshiba text messages yoka liasü, ta 2014 küm April ita nung tena aija tena nem tasüba temerenshi agütsütsü obendang agüja liasü.

2013 küm June 18 nü Gojra nung aliba mosque ka nung Muslim nunger putir,

Muhammad Hussain indang phone nung Tsüngrem mezüngmeshiba text message kar aru aser text message ji Shagufta indang registered phone number nungi liasü, ta tai tongloktsü.

Hussain-i item text message ji pa indang lawyer, Anwar Mansoor Goraya dang sayu. Tesülen Anwar-ia Shagufta-i pa dangia English oshi nung Tsüngrem mezüngmeshiba text message yok, ta tai tonglokja liasü.

2013 küm July 21 nü Shagufta aser la kinüngbu, Shafqat naprongla apu aser Pakistan's Penal Code kübok Arrla 295-B aser 295-C nung ajemdaker tena aitsü.

Shafqat-i ashiba agi, Gojra City Police-i pa kinüngtsü aser tanurtem lia pa kanga reshikangshia liasü.

Shagufta-isa ashiba agi, tamalen par chir aser kiyong nung tanur kar tsüngda rara adokba nungi Hussian-i par kibong anema inyak. Shagufta-

i, Hussain-i asalentong tamajung yanglur la indang National Identity Card auya, aser ibaji amshia la tenü nung SIM card ka lia liasü. Iba SIM card ji amshia Hussain-i pa indang phone nung pasasa Tsüngrem mezüngmeshiba text message yok.

Text messages ji English oshi nung zülua lir, ajisüaka Shagufta aser la kinüngbu napronglai English oshi mejembiteter mesüra mezüluteter.

Iba ken o bushisüngdangba mapang nung Khristan apuani na anema kuli tejanga mangu aser police-ia SIM card aser phone napronglaji mangu. Khristan apuani na anema kuli tejanga menguaka 2014 küm April 4 nü tena nem tasüba temerenshi agütsütsü atema obendang agüja liasü.

Tena aitsüba sülen küm trok tashi arudang Amnesty International-i Pakistan sorkar dang Khristan apuani na chiokang, ta takhangba agütsür.

## China-i Khristanem tali reshikangshitsü; NKoreanung laishiba bulua angutsü

**February 28, 2021:** 2021 küm China aser India linük na nung Khristanem taliba reshikangshitsüa akok, aser Khristanem tamajungba reshikangshiba linük- North Korea nung Laishiba kanga bulua angutsü, ta Release International-i metetdaksü.

North Korea nung Khristanem kanga mejungi reshikangshiaka küm shia iba linük nung laishiba timba-timba angur.

2000 matongdang North Korea nung nisung 16-i dang Laishiba ngua liasü saka 2000 küm sülenbo North Korea nung nisung 559-i Laishiba ngua liasü.

2020 küm coronavirus tashidak anema tenokdangbatem aika liaka Tsüngremi lenmang lapokja Release International partners-i North Korea linük tesem aika nung Laishiba jenti lemtsüogo.

"Tasa jenti benshia (North Korea nung aliba) underground Arogotem nung mapa jenti inyakogo," ta Release International partner kati metetdaksü.

Release International-isa China nung tamanga yimsütem

nokdangtsü atema ozüng tesashi benokba, Tenla kitem shibangtsüba, aser register süa aliba Arogotem dang Tenla kidang CCTV cameras inoktsü aser Communist tangatetbatem proktsü tuyuba osang metetdaksü.

Osangbener den jembidang Release International CEO, Paul Robinson-i, "China nung communist sorkar kübok Khristanem anema inyaker, Iran aser Malaysia na nung Islam yimsü amangertemi Khristanem anema inyaker aser India nung Hindu yimsü alia amangertemi Khristanem anema inyakba kanga bulua akümer," ta metetdaksü.

"Reshikangshi aser wara (coronavirus) liaka alima tesem ajaklen Khristanem tasü aitba aser Tsüngrem dak tamang akaba kuli asenoki angur," ta paisa ashi.

Release International report ajanga ashiba agi, shishilembaba nung ajemdaker China linüki alima nung nüburtem tebang nembangtsüogo.

"Tir, Xi Jinping-i communist onük anema nokdakertem anema inyaker. Tangbo linük

aikati pei rongsenkettsüng jenjang ajungtsü atema parnok den shishilembatsü nungdak, ta bilemer," ta Release International report nung shia lir.

Release International Report ajangsa, 2021 küm India nunga Khristanem reshikangshiba tali akümtsüa akok, aser ibaji India nung Hindu nationalism ainba ajanga lir, ta metetdaksü.

2020 küm January ita nungi October ita tashi nung India nung Khristanem anema inyakba tatalokba 225 liasü; 2019 küm nungbo kasa mapang (January nungi October tsüngda) nung Khristanem anema inyakba tatalokba 218 dang liasü, ta India Alliance Defending Freedom (ADF)-i metetdaksü.

2021 küm China aser India na nung Khristanem ano taliba reshikangshitsü, ta asadangtetba osang ya Release International indang Voice magazine nung adokogo. Iba dak alia 2021 küm Malaysia, Iran, Pakistan, Egypt aser Nigeria linüktem nunga Khristanem taliba reshikangshitsü, ta kasa report nung shia lir.

## ANOGO ABEN TSÜNGREM DEN

### Taküm Tenla

*Aser Yisui ola tulu agi ayimtener külen, Pai ashi, Oba, ne ket nung ni kü nela agütsür.*

*Luke 23:46.*

Abrahami par chir Isak tenla agütsübaji "tekülemba" ta amshi (Lipok 22:2,5). Khristai pei sasa tenla agütsübaji alima nung tenla tulutiba lir. Kodang Yisui Pa tanela Tebu nem bendanga agütsü, kotak aser ali Tsüngremi iba tekülemji agizük. Iba indang Tsüngrem chiri Pa tepila O nung ashi, "Tenla aser tenlaba nai maginer, saka ni asoshi nai renemogo." (Ibri 10:5-7).

Asen temang taküm aliba tenla ka magütsüra Tsüngrem aliba tenla ka magütsüra Tsüngrem tsüngdang tenlaji türunem aketba tenla masü (Rom 12:1). Yisu asüba ajanga asenok dang sayuba tangazükba korangji ibai lir (Ef. 5:1,2). Ano tanga tekülemi asenok Tsüngrem alidak tonga manir. Kodang Yisui pei taküm tenla agütsü taindangba sü ali nungi azük tashi ana küma shima (Lk. 23:46). Temeshitiba taktang joko meshibang! Tsüngremnem asen taküm tenla ka ama agütsüba tetezü alima mapa memeshiba mapai asenok mesüzükdang masü ta songtemba lir (Rom 6:13,19). Ibai tebenja ajanga aoba lir. Laishiba asenok dang pei sasa temenen nung asü aser Khrista nung taküm alir ta züngshiang (Rom 6:11). Iba yagi anogo shia tajung kümdaktsür- Deobar tajung, Hombar tajung... Good Friday, Good Saturday!

Kodang Yisu tasü nungi shia arur mezüngbuba nütsüngtem dang ashiba oji, "Ajak junga liang" (Mathi 28:9). Parnoki Pa tsüngdang apudaka Pa külem.

Mary Magdalene-i atsüki inyaker kati jembir ta bilem. Saka kodang Yisui "Mary" ta aja lai Yisu ta ajitet aser tepela agi, "Rabboni" ta ayimten (Yn. 20:15-17) temeim sayu.

Kodang Yisui Thoma dang Pa tarak sayu, pai ayimten, "Kü Kibur, kü Tsüngrem" süngmangba sayu.

Kü teka, kü tetsüng agiang aser nai mulungba nung arakzüdakang.

## Indonesia nung küm 18 sülen Building Permit ngua Tenla ki lapok

**February 28, 2021:** Indonesia 150 (March 9, 2002 nü kübok Java nung aliba Arogo agütsüba) ji tang tashi tagila, ta Tenla ki atema permit küm 18 tashi magütsüba sülen tesüsa temelaba ngua Tenla ki lapokogo.

Küm aika sülen Provincial Government of Central Java, Regional Government of Jepara Regency aser Forum for Religious Harmony (FKUB)-i Dermolo village, Kembang District, Jepara Regency, Central Java nung Evangelical Church in Java Land (ITJ Church) dak sendakba ken o bentetsüogo.

Dermolo yimdak tekülem ki asütsü atema temelaba agütsüba- IMB Number: 648/

Presidential Staff Office nung Deputy V, Jaleswari Pramodawardani-i, "Amongnü, February 7, 2021 nü Jepara Regent-i ITJ Arogo nung züngsemtemi Tenla kidangji tekülem sentong agitsü akok ta telemtetba agiogo," ta metetdaksü.

Paisa, "Linüki sensotem nem security agütsütsü, iba nungji tamangba yimsü ajak sadoka amangtsü temeden kümüzuka ayutsü densema lir, aser Tir Joko Widodo-ia iba onük atema tongtibang süa inyaker," ta metetdaksü.


**OLONG PAITEP # 5739**

1			2					3		
4							5			
						6				
				7						8
		9								
							10			
11							12			
13										

<b>TIPILEN</b>		<b>LANGTSÜNGLEN</b>	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

**OLONG PAITEP # 5738 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Yimlibilem, 4. Anak, 5. Tangar,		1. Yongya, 2. Moko, 3. Marok,	
7. Aya, 8. Arong, 11. Par,		5. Teronem, 6. Nung, 8. Amajok,	
13. Lemjem, 14. Oagi, 15. Mulung.		9. Jangzü, 10. belem, 12. Rong.	



**ALOKBA O WARAKLA NA BALATSÜ BILL INYAKTEPER.**

**Alokba** : Joko koda asütsü, nai ni ashiba mangai na sünütsü dang asürji ni maremtetka taji ana balatsü. Ana lir küm terpungu pura jungogo, anungji ni iba amaji bill inyaktsüa. Na anogo shia chiyungba, khi chiyung nung sen 150, anungji anogo nung anaben chiyungbaji sen 300. Süra 15years×365days×300 = Rs.16,42,500/- tang züngjang aser ayazükang.

**Warakla** : Saalaa, na dang tokolok ali ama pilemer? Nia bill ka inyakdima. Anogo shia sorochioka süngo anepalua chiyunga/jema anepaluba=Rs.150/- Anogoshia laundry=Rs.100/-, Aonungshi yipden lemtedaktsüba=Rs.150/-, süra anogoshi totalji Rs.400/-. Anungji küm terpungu nungji, 15×365×400= Rs.21,90,000/-, sürapangla: Rs.21,19,000/- nungji Rs.16,42,500/- ji endokra ni angutsüji Rs.5,47,500/- iba senji tangsa tang kwa, aserang ayazükdi.

**Alokba** : Honey, divorce plan cancelled!!

Lilir : WhatsApp

**TANÜBO NAI LANGZÜANG**

Q. Koba tesem nung India indang 1buba Underwater tunnel lapoktsü?  
 A.Mumbai B.Chennai C.Kolkata D.None

—————(Taruba adok nung onoki langzüksü)

**YASHI ADOK TELANGZÜBA** : September 2019

**AO OSHI ANGAZUKDAK:**

TANU ANGAZUKTSUBA OJANG

1. **Aab** = mopung talem .  
 \* `Joko Metsuremi (March) atong metetmeteta tanu nungibo aab tenzucker.

**NAI-A YA METETTER MA?**

**MARCH 2021' NUNG TONGTIBANG (NATIONAL ASER INTERNATIONAL) ANOGOTEM:**

- March 1 - Zero Discrimination Day
- March 3 - World Wildlife Day
- March 4 - National Safety Day
- March 8 - International Women's Day  
- Ramakrishna Jayanti
- March 10 - CISF Raising Day  
- Second Wednesday of March: No smoking Day
- March 16 - National Vaccination Day
- March 20 - International Day of Happiness  
- French Language Day (French)
- March 21 - International Day for the Elimination of Racial Discrimination  
- World Poetry Day  
- International Day of Nowruz  
- World Down Syndrome Day  
- International Day of Forests
- March 22 - World Water Day
- March 23 - World Meteorological Day
- March 24 - World Tuberculosis Day  
- International Day for the Right to the Truth concerning Gross Human Rights Violations and for the Dignity of Victims
- March 25 - International Day of Remembrance of the Victims of Slavery and the Transatlantic Slave Trade  
- International Day of Solidarity with Detained and Missing Staff Members
- March 29 - Holi

**SUDOKU # 5780**

**TELANGZUBA # 5779**

1			3	5			2	9	1	7	3	6	8	2	5	4	9
3		6	8				1		2	4	9	1	5	7	3	6	8
				9			4		5	6	8	9	3	4	7	1	2
9	6			4			3		3	8	7	5	2	1	6	9	4
5				9			7	1	4	9	1	8	6	3	2	7	5
		3		5	2	1	9	8	6	5	2	7	4	9	1	8	3
		4			8				7	3	5	4	1	8	9	2	6
	1				5				8	1	6	2	9	5	4	3	7
8		9		7				5	9	2	4	3	7	6	8	5	1

**OJANG LUTEP # 5326**

- EPI :
- AJZÜKANGTSÜ :
- GJTEJANGJA :
- LIKU :
- GUNA :
- MERTETE :
- ENSÜL :
- KATE :
- LASAA :
- RIYATEP :

**OJANG LUTEP TELANGZÜBA # 5325**

TESÜLEN MEYIPTSÜBA DAK ALAKATEJAKLENIAOTSÜBO TEIMLA  
 KECHA MALI KÜMADOK

**TAN HOPTA ATEMA - KOMA SÜLA ?**

Q. Nagaland nung yi ayokba dokan odia lapokdaktsü nunga koma süla?

# Left-Congress-ISF-i Assembly elections atema nüboyim tenzük



Kolkata, February 28, 2021: Amongnü Kolkata nung Left party tem, Congress aser Indian Secular Front (ISF) teloktep Joint Front-i ayongzükba election nüboyim sentong nung ajichilen nungi-Congress lenir, Adhir Ranjan Chowdhury, CPI General Secretary D. Raja, Chhattisgarh Chief Minister Bhupesh Baghel, CPI(M) General Secretary Sitaram Yechury, Left Front Chairman Biman Bose aser ISF lenir, Abbasuddin Siddiqui nunger adenba noksa nung angur.

**Kolkata, February 28 (Agencies):** West Bengal nung Assembly election agitsü mapang ana nung lia state nung Amongnü Left party tem, Congress aser Muslim putir Abbas Siddiqi-i aniba Indian Secular Front (ISF) teloktepi election atema nüboyim sentong tenzükogo.

Taruba state election nung Chief Minister, Mamata Banerjee-i aniba Trinamool Congress aser BJP na den Left-Congress-ISF teloktepi tokteptsü.

Amongnü Kolkata nung aliba Brigade Parade Ground nung party asem teloktep election nüboyim sentong nung nisung sünga adenshi. Party asem nungi lenirtemi iba teloktep dang Sanyukta Morcha, mesüra Joint Front ta ajar.

Iba sentong nung jembidang CPI(M) politburo züngsem, Md Salim-i, "Tesüiba küm 10 tsüngda TMC-i state nung mapa adokdaksütsü atema kecha

meinyak, aser BJP-i aniba Centre sorkaria tesüiba küm tenet tsüngda Bengal nung sen indoka meinyak," ta metetdaksü.

Tang tashi nung ISF-i Congress den menden melemsa aser sabang nungi jembidanga Siddiqi-i Left candidate tem yaritsü atema dang mepishia liasü.

Osangbenertem den jembidang pai, joko mapang mali, anungji Congress-i tekaraba nung menden lemsatsüla, ta ashi. "Sonia Gandhi-ibo melungogo saka state nung (Congress) lenir kari tetsükdaksü agütsür, ta ni osang angashiogo," ta metetdaksü.

2019 küm Lok Sabha elections jakdang Left party temi Trinamool Congress sorkar dang aija liasü saka tan election nüboyim nungbo parnoki BJP-a aitsür.

"BJP-i ochimashi anentsütsü ta nangzükter, ajisüaka parnoki

TMC nungi auer aser ochimashirtem ajak par party nung anioker," ta Salim-i aitsü.

Sabang nung CPI(M) all-India general secretary, Sitaram Yechury, Congress nungi Lok Sabha lenir aser Bengal unit Tir, Adhir Ranjan Chowdhury aser Congress nungi Chhattisgarh chief minister Bhupesh Baghel nungera liasü.

Congress lenir Chowdhury-i, "Telemsa adokdaksüba BJP asenoki Bengal nung magizüktsüla aser TMC-i tim mesüi yimsüsüba anentsütsüla," ta ashi.

Yimtenren nung mongintemi ashiba agi, tamalen state nung Left-Congress teloktep asentenshiba ajanga BJP indang votes agitsü ta bilem saka votes ji BJP dangi ao, ajisüaka tangbo party ana teloktep nungji Siddiqi-i aniba party-a adener, anungji Trinamool Congress atema jenjang majungtsüa akok, kechiyong TMC-i Muslim nunger votes imlar, ta ashir.

# Shingaia mapa manguba aser aluyimertem atema mejembir: Tejashwi

**Patna, February 28 (Agencies):** Bharatiya Janata Party aitsüba olen ka nung Amongnü Rashtriya Janata Dal (RJD) lenir, Tejashwi Yadav-i, shingaia mapa manguba tebilemstü aser nüburtem tebilemstü onüktem atema mejembir, ta ashi.

"Lanurtem tebilemstü, mapa manguba tebilemstü, sepaitem tebilemstü atema jembitsüla. Democracy linük nung shingaia nüburtem tebilemstü, aluyimertem aser mapa manguba tebilemstü

atema mejembir. Itemji jembitsü melen tongtibang onüktem paidoktsü atema dang jembir," ta RJD leniri Hindi oshi nung twitter ajanga metetdaksü.

State pezü aser UT Puducherry nung assembly election agitsü atema anogotem sangdongba sülen Yadav-i tang mezüing BJP-i aniba Centre sorkar anema jembir.

Linük nung gari totzü jenjang kanga atuba anema longkak aita Hokolbarnü pai Patna nung par

kidang nungi Secretariat tashi cycle nung oa liasü.

RJD-i Assam Assembly elections nung tokteptsü, ta metetdakja pai, "Ozü party ya national party ka liasü aser onoki party ulushiner. Assam ya NorthEast kikümbang lir. Onoki Assam Assembly election nung tokteptsü lemtetogo. Party lokteptsü atema onoki Congress den jembidanga aser Ajmal sahab (AIUDF) den-a jembitsü," ta metetdaksü.

# Aluyimertem lenir Tikait-i state 5 semdangtsü

**New Delhi, February 28 (Agencies):** Tang linük nung aluyimertemi Centre sorkari benokba ozüing tasen asem anema longkak aitba pusemdaksütsü atema March ita nung aluyimertem union lenir, Rakesh Tikait-i state pongu sema senzütsü, ta Bharatiya Kisan Union (BKU) office ketdangpurtemi metetdaksü.

BKU National otongdar, Rakesh Tikait-i March 1 nungi tenzükba state pongu sema senzütsü, aser iba mapang nungji pai senden aika ayongzükba amentsü.

BKU media in-charge, Dharmendra Malik-i, "Aluyimertem sendenji Uttarakhand, Rajasthan, Madhya Pradesh, Karnataka aser Telangana nung amentsü aser March ita nungsa Uttar Pradesh nunga senden ana amentsü," ta metetdaksü.

Rajasthan nung senden ana aser Madhya Pradesh nung senden asem amentsü aser tesüsa Karnataka nung March

20, 21 aser 22 anogotem nung senden amentsü, ta Malik-i ashi.

"March 6 nü Telangana nung senden ka amentsü sentong, ajisüaka state nung election kar aliba agi tang tashi nung onok nem temelaba magütsü. Temelaba agütsüra Telangana nung iba anogo nungji senden amentsü," ta pai osangbener nem metetdaksü.

Yaküm November ita tatembanglen nungi state balala nungi aluyimertem meyirjang aika Delhi arrtsülen- Tikri, Singhu aser Ghazipur nung adenshia tang tashi longkak aitar. Aluyimertemi Centre sorkar dang farm ozüing asemprongla agienang, ta takhangba agütsür.

Ghazipur arrtsü nunga Rakesh Tikait leniba nung aluyimertemi longkak aitar.

Aluyimertem onük bentettsü atema Centre sorkari aluyimertem union den senden 11 ben tashi menogo, ajisüaka tang tashi telemtetba kecha magiteter.



Nagpur, February 28, 2021: Coronavirus tashidak kanga bulua prokba agi Nagpur nung ketdangsertemi Honibar nungi Amongnü tashi tenokdangbatem benokba ajanga Nagpur nung aliba tongti market shibanga aliba noksa nung angur.

# India nung ano nisung 16,752 dak Covid putet

**New Delhi, February 28 (Agencies):** Amongnü tashi nung India nung nisung ajak agi 1,10,96,731 dak coronavirus tashidak putetogo; tesüiba ghonda 24 tsüngda linük nung nisung 16,752 dak coronavirus tashidak putet aser ibaji tesüiba anogo 30 tsüngda tang timba putetba lir, ta Union health ministry data ajanga metetdaksü.

Tesüiba ghonda 24 tsüngda linük nung coronavirus tashidak agi nisung 113 süogo, aser linük nung iba tashidak agi asür ajak senteperbo 1,57,051 jungogo.

January 29 nü linük nung nisung 18,855 dak iba tashidak puteta liasü, iba sülenjibo tesüiba ghonda 24 tsüngda timba puteter (16,752).

Tang linük nung iba tashidak agi teshirangdakpur 1,64,511 lir, aser ibaji coronavirus caseload

nungi shilem 1.48 lir, ta Health Ministry-i metetdaksü.

Linük nung iba tashidak agi shiranger ajak agi 1,07,75,169 anepogo aser iba tashidak agi anepertem shilemji 97.10 lir. Iba tashidak agi asür shilem 1.42 dang lir.

Indian Council of Medical Research-i ashiba agi, February 27, 2021 tashi nung samples ajak agi 21,62,31,106 tendangogo aser iba nungji Honibarnü samples 7,95,723 tendangba densema lir.

Honibarnü cabinet secretary-i tang linük nung coronavirus kanga bulua prokba union territories aser state 8-Telangana, Maharashtra, Chhattisgarh, Madhya Pradesh, Gujarat, Punjab, Jammu & Kashmir aser West Bengal state tem den senden mena liasü.



New Delhi, February 28, 2021: Amongnü New Delhi nung National Science Day sentong nung Department of Science & Technology Secretary, Prof. Ashutosh Sharma aser Secretary, DSIR & DG, CSIR, Dr. Shekhar C. Mande nati award angurtem den külemi tangokba noksa nung angur.

# Myanmar longkak aitdak azüdokshi, nisung tenet asü

**Naypyitaw, Tsüklai/February 28 (Agencies):** Myanmar mitkartemi tashiyim amshia sorkar atsüngdokba anema nüburtemi hopta ishika longkak aita aruba rongnung Deobarnü tamajungtiba liasü, kong police temi injang khalokja nisung tajemba agi tenet asü aser aika yiru, ta osangtem ajanga ashi.

February 1 nü mitkartemi sorkar atsüngdoka election ajanga shimtetba sorkar lenir Aung San Suu Kyi aser lar party lenirtem timbaka apuba sülen Myanmar nung rongrong adoka arur. November ita agiba election nung ashikülak mapa minyak, ta mitkartemi tai tongloktsür, kong Suu Kyi'er teloki kanga junga takok nguteta liasü.

Mitkartemi küm 50 jungnüa yimsü süa arur tang democracy dangi meyiptsü mera maparen inyakba nung tetsükdaktsü agütsü, aser iba yongji nisung meyerijang aika yimtung nung longkak aiter aser anüolen linüktem nungi taitsüba ola adoker.

"Myanmar ya tongpang raradak tesem ka ama kumogo," ta Buddhist nunger timba aliba linük nung Catholic cardinal mezüngbuba, Charles Maung Bo-i Twitter nung ashi.

Myanmar nung yimti tulutiba, Yangon nung police temi stun grenades, tear gas aser anünglen injang khadokba agi longkak aiter maridoktetba sülen parnoki longkak aiter dak injang khaloktsü. Police tem yarisema sepaitem yoka liasü.

Yirur alir nisung kar külemi longkak aiter temi atsür ao, aser iba mapang lenmang nung



Mitkar tashi amshia sorkar atsüngdokba anema longkak aitdang Mandalay, Myanmar nung police aruba mapang longkak aiter temi yimyim ayimba mapang tangokba noksa nung angur. February 1 nü mitka temi sorkar atsüngdokba anema Myanmar nung longkak aiter azüoktsü asoshi police temi tashi tali amshia arur.

azü nüshia aliba social media balala nung nguogo. Nisung ka dak teku nung injang agi khar mozü kidangi anir aruba sülen asü, ta doctor kati ashi.

Yangon nung tesayurtem longkak aitdak police temi stun grenades pokloktsüba sülen tetsür ka temolungjang agi mapa junga meinyaki asü südi, ta külem tesayurtem aser lar jalai ashi.

South tsütsü Dawei nunga police temi injang khalokja yangjia nisung asem asü aser aika yiru, ta yimten timsüsür Kyaw Min Htike-i osangbener dang iba jila nungi ashi.

Mandalay yimti nunga longkak aiter ana tepset, ta The Myanmar Now media outlet ajanga sangdong.

Police aser tang yimsü

tesüdak mitkartem indang odongtar nungi osang kecha sangdonga mali.

Linük northeast tsütsü Lashio aser south tsütsü Myeik jila tem nunga police temi longkak aiter aridoka liasü, ta item tesem nung alirtemi ashi.

Taoba hopta ketdangsurtemi longkak aiter madak tashi tajemtiba nung amshia liasü, ta mitkar lenir General Min Aung Hlaing-i ashi.

Ajsüaka iba rongrong nung tang tashinung longkak aiter nisung 10 süogo. Mitkartemi police ka süogo ta ashir.

Yimtung nung kising masü

saka civil service, municipal administration, judiciary, education aser health sector nunga mitkartemi tashi amshitsü temolungtetba lir amai ajiteter.

"Myanmar security forces temi jila aser yimti balala nung tashi amshiba ya tesüngmangtsüka aser temolung agi magizükteter," ta New York nung amenoka aliba Human Rights Watch indang deputy Asia director Phil Robertson-i sangdong ka nung ashi.

Yangon nung nikongdang tashi longkak aiter noklang aikati yimtung yutsür aotsü

memolung. Aikati lenmangtem nokdanga ayu aser kari yimyim ayima longkak aita ken aten.

Deobarnep police temi tesayurtem longkak aita aliba aridoktsü meranga stun grenades poklokja liasü.

Police temisa Yangon medical school kimalen stun grenades pokloktsü aser yangji lab coats sentsü temesüng agir aliba doctor aser yangji azüngertem jenshia liasü. Medical staff 50 dak tema puogo, ta Whitecoat Alliance of medics telok kati ashi.

Police temi Honibarnü nisung 470 dak tema puogo, ta sorkar meyong MRTV television ajanga ashi. Deobarnü nisung kwi apuar ano mejangja.

Mitkartemi sorkar atsüngdokba melenshidaktsütsü atema nungdakba meratem agiang ta Myanmar indang UN envoy-i United Nations dang ajungshiba sülen pai linük külakoktsüba asoshi mapa nungi anenogo ta state television ajanga sangdongba sülen police temi iba mera ya agia liasü.

"Ni akok tashi raratsü lemtetogo," ta ambassador Kyaw Moe Tun-i New York nungi osangbener dang ashi.

Mitkari sorkar atsüngdokba atema anüolen linüktemi aitsüogo aser linük karibo mitkar lenir nem tenokdangba balala agüja lir. Mitkartemi election tasen agitsü nangzüka lir, saka tang tashi anogo lateta mali.

## England: School tanurtem hopta nung anaben Covid-19 tendangtsü

**London, Tsüklai/February 28 (Agencies):** England nung school mesera college tanur aliba kibongtem nung kinunger ajak nem hopta nung anaben COVID-19 tendangtsü atema maongka agütsütsü. Tanurtem school-i tanaben yoktsü atema sorkari kanga tongtibangsa inyakba pusemsü atema iba sentong amenok, ta health ministry-i Deobarnü ashi.

Taoba hopta British Ato Kilonser Boris Johnson-i, England nung COVID-19 wara prokshia aoba ajanga tenokdangba agütsür aliba agintsü asoshi shilem balala lemsar salatsüyonga aotsü atema sentong yanglur aliba metetdaktsüogo. Iba sentong ya linük mokdangba dangi tanaben meyipa moshitsü atema kanga kümdanga asadanger benoktsü.

Pai ashiba agi, mezüngbuba shilem nung march 8 nü nungi school tenzükshitsü aliba dak rangloker inyaksü aser iba mapang kimayimtung nung

nüburtem ajuruteptsü atema kangabo memelatsü. Health ministry-i ashiba agi, rapid test kits tem ya Hombarnü tesem 500 dak tema nung agütsütsü mesera workplace testing aser local community testing services ajanga agütsütsü.

Secondary school aser college kaketshirtem hopta nung anaben tendangtsü. Parnok mezüng school nung tendangtsü aser iba sülen kidang tendangtsü.

Primary school tanurtem shirnok dak tashidak keta aliba temaitsü mesayur parnok school nungbo metetdangtsü saka kidang tashidak tendangtsü atema tsürapurtem ajungshitsü.

"COVID-19 tashidak keta alir asem rongnung ka dakbo tashidak keta aliba temaitsü mesayur ta onoki meteta lir, anungji mapang shia tashidak tendanga aliba tetezü ya school aser college tem nungi tashidak keta alirtem pilaa toktsütsü asoshi lir," health minister Matt Hancock-i ashi.

## Dhaka nung BNP züngsemtem dak tear gas & rubber injang khaloktsü

**Dhaka, Tsüklai/February 28 (Agencies):** Kaket zülur ka tepuokdak asüba dak sendakba nung longkak aita sentong tasen tenzükshiba nokdangtsü atema opposition züngsemtem dak tear gas aser rubber injang khaloktsüba sülen nisung aika yiruogo, ta police aser party ketdangser kati ashi.

Local television station Channel 24-i sayuba live footage ka nung Dhaka yimti

kübok National Press Club jakdang lenmang ka nung police temi longkak aitertem züka minshiba sayuogo.

Bangladesh nung opposition party tongtiba Bangladesh Nationalist Party (BNP) nungi kaketshirtemi police tem dak long ona plastic pipe agi azük tenzükba sülen police temi tear gas aser rubber injang khaloktsü, ta Deputy Commissioner of Dhaka police Sazzadur

Rahman-i ashi.

"Parnoki temelaba magi (longkak aittsü atema)," ta police temi longkak aitertem minshiba pusema pai ashi.

BNP otongdar Rizvi Ahmed-i, iba mangatettep nung party nungi lenir tejen ka densema kaketshir 30 shi yiruogo. Kasa mapang nung officer ka densema police-a aika yiruogo, ta ashi.

(Maneni tapak 9 nung...)



Washington nung White House kilung nung aliba Eisenhower Executive Office Building nung 40th Annual Black History Month virtual anogomung amungba mapang US Vice President Kamala Harris-i o jembidang tangokba noksa ka yangi angur.



## Kohima Law College Evangelical Union Fresher's Day mungogo



**Kohima, Tsüklai/February 28, 2021 (TYO):** Hokolbarnü, (26.02.2021) Kohima Law College Evangelical Union indang Freshers' Day munogo.

"Transformed students impacting the campuses and the Nation as the disciples of the Lord Jesus Christ" nung ajemdaker Kohima Law College indang Evangelical Union Freshers' Day ayongzük. Tan academic küm nung freshers 65 (LL.B Ist Semester) dak tema lir aser iba anogomung nungtem nung freshers ajak nem sempet lema agütsü.

Iba sentong nung Ekyarhoni-i anir praise 8 worship team-i ken aten aser Khumeng o Soreni nati Tejen aser Tasen Lai nungi Tsüngrem

O azüing.

KLCEU Executive temi ken ka aten. KLCEU President Pheniang Lushing-i telok pela agizük. Iba sentong tenzuka Ayeng-i sarasadem aser sentong tembanga Abang-i sarasademtsü.

Asst. Professor Kezhokhoto Savi-i, College azüingba mapang Evangelical Union nung yakyaka shilem agiba ajanga tajangzük den tepela anguba aser iba den külemi aier - asangur tem Khristan taküm ka ka ama alitsü asoshi tanela nung temelenshi adokdaksüba indang lemsatep.

Savi-i, pa Patkai Christian College nung graduation mapang Patkai Christian College Evangelical Union

nung züingsem ka ama inyakdang tajangzük angubatem telok den lemsatepa liasü.

Kasa sentong nung Freshers kari parnok graduate asüba college nung E.U maparen tsütsü ajangshibatem lemsatep. Asst. Professor Moasenla, shiba KLCEU indang teacher-in-charge lir, lai freshers atema sarasademtsü.

Maneni, iba sentong nung Asst. Professor Soni Magh o jembir liasü. Lai Lipok kakat nungi Yoseph taküm otsü nung ajemdaker jembir. Iba den külemi Soni-i 1Tim 4:12 nung ajemdaker kakatshirtem ajungshia liasü. Iba sentong temer sülen süngojemba mapang agi, ta sangdong ka ajanga metetdaksü.

## Minister Jacob Zhimomi-i Melahumi aser Shevishe semdang

**Dimapur, Tsüklai/February 28, 2021 (TYO):** Minister, PHED. Govt. of Nagaland Jacob Zhimomi den Peter Lichamo, Deputy Commissioner, Zunheboto, Kitoshe Sumi EE PHED aser Jal Jeevan Mission (JJM) amenoktsü atema maparen lemsatep.

Sorkar ketdangsürtemi Hokolbarnü (26.02.2021) Aghunato Sub-Division kübok Tokiye RD Block nung Melahumi aser Shevishe yimtsüing semdang, ta sangdong ka ajanga metetdaksü.

JJM (Jal Jeevan Mission) ya India Ato Kilonser Narendra Modi'er Sorkar indang mapatong ka lir, koba ajanga

2024 tashi India kübok kilen shia nung Functional Household Tap Connection (FHTC) agütsütsü nükjidong lir.

Yimtsüing ana semdangba mapang Minister-i yimertem den sensaksem aser FHTC tajangzük angurtemi pa Dang pelaba metetdaksü. Melahumi yimtsüing nung lokti telongjem sentong ka agiba mapang, Lizutomi aser Satami yimtsüing nungi nübur lennirtem aser GB temi Minister dang tajemtsü tzü temerük nungdakba aser parnok tebilemba lemsatepa liasü.

Bobohu ayong nungi Zunheboto District HQ tashi tajemtsü tzü meser alutsü Department dang mulungsoa

melaba asoshi Melahumi aser Lizutomi yimertem dang Minister-i pelaba metetdaksü.

Minister-isa, Zunheboto Town Phase-2 nung water supply atema 150mm dia. Gravity mainline inoka aoba maparen aser Melahumi Village nung 'water treatment plant' anaprongla semdanga liasü.

Kasa anogo, JJM kübok Har Ghar Jal maparen dak sendakba nung Zhimomi-i pa indang department aser Zunheboto District indang Civil Administration den senden ka amen aser ketdangsürtem dang pei nem nungloksüba maparen junga achaayanga inyaktüsü ajungshiogo.

## Dhaka nung BNP züingsemtem dak tear gas...

(Tapak 8 nungi...)

Paisa, press club kima longkak aiter 500 dak temai kaketzülur Mushtaq Ahmed asüba anema longkak aittsü asoshi human chain ka yanglutsü meranga liasü, ta ashi. Mushtaq Ahmed ya Dhaka anütoktiplen tepuokdak ka nung Brehostibarnü asü.

National Press Club nung longkak aittsü atema temelaba magiba dak sendakba nung party pusema pai, iba tesem

nung longkak aittsü atema temelaba agitsü nungdak mali, ta ashi.

"Human chain ka yanglutsü atema parnok nokdaka aliba mapang police temi parnok dak azük tenzük," ta pai ashi.

Mushtaq Ahmed asüba dak sendakba nung pai, "pa tepset aser state densema alitsü ta onoki bilemer," ta ashi.

International aser local rights teloktemi, kaketzülur asüba ken

o takaratiba nung bushitsüingdangtsü khangogo. Pai social media nung pa tebilemba lemsatepba sülen ita ter tejakdang apu.

United States, France, Britain, Canada aser Germany densema linük 13 nungi Ambassadors temi iba ken o kanga tebilemstü kaa bilemba lemsatepogo.

Ahmed ya digital security laws kübok aija apu aser pa nem trokben tashi bail magütsü.

## Prabhas indang 'Salaar' April 2022 nung sayatsü

**Mumbai, Tsüklai/February 28, 2021 (Agencies):** Film yanglur Prashanth Neel indang aruya aliba underworld action thriller "Salaar" ya April 14, 2022 nü theatre nung sayatsü terenemba lir. Iba film nung South star Prabhas-i tongti shilem agiba angütsü.

"Pan-India" project ka ama "Salaar" film ya Hombale Films ajanga yangluogo.

Taoba nunga, Neel-i blockbuster action movie franchise "KGF" yangluba ajaki jangjaa lir aser Twitter ajanga pai film poster den film sayatsü anogo lemsatep. "April 14, 2022 nung #Salaar sayatsü. Nenok den külemi benjungteptsü yongyar," ta director Neel-i lemsatep.

Iba film nung "Baahubali" star Prabhas-i jakla tesashi aketba nisung ka ama shilem agiba angütsü. Taoba küm December ita iba project sangdongba mapang, Prabhas-

i, "Salaar" ya kodanga mengudangba aser mangashidangba otsü ka alitsü.

"Iba film ya jangratemtsüka lir aser kü character ya jakla balaka aliba nisung ka lir, ajasünung taoba mapang ni iba ama project nung kodanga meinyakdang. Iba ya pan-Indian film ka lir aser film sayatsü asoshi yongyaseter," ta arishi küm 41 tain actor Prabhas-i ashi.

"Salaar" dak alaka Prabhas-i film yanglur Nag Ashwin indang multilingual sci-fi film nung Deepika Padukone den külemi shilem agiba angütsü. Om Raut indang screen adaptation Ramayana "Adipurush" aser Radha Krishna Kumar indang romantic-drama "Radhe Shyam" nunga pai Pooja Hegde den külemi shilem agiba angütsü. "Radhe Shyam" film ya July 30 nü sayatsü.

## AR-i Ngwalwa nung Medical Camp ayongzük



**Peren, Tsüklai/February 28, 2021 (TYO):** HQ IGAR (North) tawabangba kübok Jalukie Battalion indang Assam Rifles-i Hokolbarnü (26.02.2021) Ngwalwa village, Peren District nung Medical Camp ka ayonga agiogo.

Iba medical camp sentong nung Assam Rifles medical team-i yimer ajak medical check up achaayanga agi. Kasa mapang team-i yimertem dang tang ama tensa (Covid-19) mapang temang anema aser

merük mejua alitsü asoshi inyakyim balala tongmelang agi rasa ashi aser parnok temang nung timtem balala den apet nungdakba mozütem agütsü.

Iba medical camp nungi tetsür 161, tebur 122 aser tanur 84 densema yimer 367 shi ajangzükogo.

Tang ama tensa tamajungdang, meimchir asoshi bilemja aser nungdakba teyari agütsüba asoshi Ngwalwa yimertemi Assam Rifles dang pelaba metetdaksüogo.

## Security Forces-i Kisakita nung yi apu



**Dimapur, Tsüklai/February 28, 2021 (TYO):** Brehostibarnü (25.02.2021) Security Forces den in Police nungi teshimtet nübu longjemer Zunheboto District kübok Kitsakita general area mita aoba mapang nisung trok den yi (IMFL) apu.

Osang tejangja ka angazükba nung ajemdaker, Security Forces den police longjemer team kati Kitsakita

general area mita aoba mapang, nisung trok den sen 8, 72,100/- alang IMFL apu. Item yi rongnung MC Dowell No.1 Rum bottle 929 aser Kingfisher beer 120 ngutet.

Iba maparen dak sendakba nung maneni bushitsüingdangtsü atema pua alir nisung trok aser item yi ajak Zunheboto Police Station nung agütsüogo, ta sangdong ka ajanga metetdaksü.



February 28, 2021: ISL 2020-21 asaya 108buba Odisha FC aser SCEB na asaya OFC-i goal 6-5 agi kokogo.

## Odisha nung Indian Women's League 2020-21 asayatsü

**Tsüklai/February 28, 2021 (Agencies):** Indian Women's League 2020-21 edition Odisha nung asayatsü, ta All India Football Federation-i jangjatsüogo. Asayamung anogo takaratiba nung metetdaksütsü, ta AIFF-i sangdong ka ajanga metetdaksü. IWL koba 2016 küm Delhi nung tenzük iba asayamung ya taküm agi pongubenbuba asayatsü. Iba asayamung ya tatemsa Gokulam Kerala FC-i kokogo. Taoba küm February 14 nü Bengaluru nung final asayaba mapang Gokulam Kerala FC-i goal 3-2 agi Kryphsa akok.

"Odisha sorkari Indian Football kanga nongita yaria arudar. Hero Indian Women's League ayongzüka asayatsü atema teyari agütsüba atema Naveen Patnaik ji, Vishal Kumar Dev, Vineel Krishna aser Odisha Sports Department dang kanga pelar. Küm tem tsüngda iba asayamung ajanga lanur asayatem aikanem parnok sempet sayatsü asoshi sabang agütsüogo aser parnok nem football asaya ya career ama agütsü atema maongka agütsüogo," ta AIFF tir Praful Patel-i ashi.

Indian Women's League atema state qualifiers tang asayadar mesera state balala

nung asaya tenzüksü lir. West Bengal nungi SSB Women's Club qualify süogo, parnoki 2020 küm December 30 nü Kanyashree Cup final nung East Bengal koka liasü. Tang Karnataka, Gujarat, Odisha aser Goa nung tetsürtem league asayadar. Delhi Women's League March 22 nü tenzüksü aser Madhya Pradesh Women's Premier League Barwani FC-i kokogo. AIFF General Secretary Kushal Das-i Odish sorkar dang pelaba lemsatepba den ashiba agi, taküm IWL nung asaya timba asayatsü.

"India nung saisapong terenlok aser talisa Indian football terenlok asoshi Odisha Sports' nükla lir. Odisha-i, India nung tetsür football asaya mapang talangka nongita aruogo. Tetsürtem ajungkettsü atema ni pusemer aser Odisha nung Indian Women's League ayongzüka asayaba ajanga onok nem linük nung All India Football Federation den külemi tetsür football asaya ajungkettsü atema maongka agütsür. India nung tetsür asayartemi konang nüngsang aika bener arutsür aser tarutsü nung tetsür football asayartemi konang nungsang tali bener arutsütsü ta ni amanger," ta Odisha Minister

of State, Sports and Youth Services Tushar Kanti Behera-i ashi.

"Indian Women's League 2020-21 edition ayongzüka asayaba ya Odisha Sports atema takok ka asütsü. Chief Minister Naveen Patnaik lenisüba nung Odisha ya linük nung saisapong ajungketba tesem tulutiba ka kümogo. CM lenisüba kübok state nung saisapong nung temelenshi tulu adokogo. IWL ayongzüka asayaba ajanga state nung football asaya meimertem tali jangrabangradaksütsü. Iba asayamung takok nung ayongzüka asayatsü imlaa atar," ta Principal Secretary, Sports & Youth Services Department, Government of Odisha, Vishal Kumar Dev, IAS-i ashi.

Wara poktetba sülen India nung saisapong tenzükshiba nung Indian football tejakdang ser anidar. Football asaya I-League Qualifiers nungi tenzük aser iba sülen Indian Super League aser I-League tang asayadaki.

Tawa India tetsür football team Turkey nung oa Serbia, Russia aser Ukraine den asayaogo. Iba masüadang parnok December 1, 2020 nü nungi tenzük ita ana tashi Goa nung training agia liasü.

## Mathews lenisüba kübok Sri Lanka team asayatsü

**Tsüklai/February 28, 2021 (Agencies):** Sri Lanka team nung taoba mapang captain Angelo Mathews lenisüba kübok West Indies den Twenty20 asayamung ka asayatsü. Visa dak sendakba nung ken o adokba sülen captain Dasun Shanaka masayatetsüsa akümba ajanga iba jenjang agi, ta SL cricket board-i ashi.

Taoba hopta-ang Sri Lanka Twenty20 team captain asütsü Shanaka shim, saka arishi küm

29 tain asayar ya par team den Hombarnü mapusotet. Pa United States-i aotsü atema transit visa tasen meyanglutetba sülen motettsüsa aküm.

"Dasun Shanaka shiba West Indies tour atema T20 captain asütsü shim, pa U.S. transit visa mongui aliba ajanga ano team den melungjemeti lir, anungji national selector temi captain asütsü asoshi Mathews shimogo," ta Sri Lanka Cricket sangdong ka ajanga metetdaksü.

"Shanaka-i pa indang taoba passport samaba ken o benokogo, kong USA stamped atema visa shidak lir.

"Iba ken o bentetba sülen pa team den longjemtsü," ta kasa sangdong ajanga metetdaksü.

Brehsotibarnü nungi tenzük Sri Lanka aser West Indies na Antigua nung terpranger medeni Twenty20 asaya asem, one-day internationals asaya asem aser Test asaya ana asayatsü renema lir.

## India WTC final-i ira Asia Cup thimentsü: PCB

**Karachi, Tsüklai/February 28 (Agencies):** Pakistan Cricket Board (PCB) mendenbuba Ehsan Mani-i Deobarnü ashiba agi, India World Test Championship final-i ira June ita asayatsü aliba Asia Cup thimentsü akok.

"Asia Cup taoba küm asayatsü liasü saka taküm asayatsü telemtetba agi. Taküma Asia Cup masayatetsü akok kechiyong June ita WTC final asayatsü lir. Sri Lanka-i iba asayamung June ita ayongzüka asayatsü merangtsü ta shiogo," ta Mani-i Karachi nung osangbenertem dang ashi.

"Anogotem mesüteper. Onoki iba asayamung masayatetsü ta bilemer aser 2023 kümiang belener aotsüsa akümtsü akok," ta paai ashi.

PCB CEO Wasim Khan-ia, India WTC final atongtsü amai reprangteter anungji Asia Cup thimentsüsa akümtsü, ta ashi.

"India final tonger ama reprangteter aser parnok New Zealand den asayatsü. Anungji Sri Lanka nung asayatsü aliba Asia Cup masayatetsü akok. Onok osang tejangja ka atadar, aser asayamung masayatetsüsa kümra tarutsü atema onok sentong yangludat," ta Khan-i ashi.

Mani-isa, taküm asayatsü aliba T20 World Cup atema

India nungi visa agizüksüba dak sendakba nung International Cricket Council (ICC) dangi onoki shiti ka zülüogo, ta ashi.

"Taküm October-November ita India nung T20 World Cup asayatsü. Ni board dangi onok indang fans, osangbener aser asayatem indang visa dak sendakba nung tezüluba nung osang tejangja meshia shiti ka zülüogo. Ni ICC den senden ka amentsü lir anungji ni iba ken o benoktsü," ta Mani-i ashi.

PCB-i India dang asayar, support staff, fans, aser media züngsemtem indang visa dak sendakba nung osang tejangja asüngdangogo. Mani-isa, India-i tenangzüka ka magütsütetra T20 World Cup tanga tesem kati belener aotsüla ta ashi.

"ICC-i March ita tashi nungbo osang agütsütsü ta shiogo. Tenangzüka ka magütsüra asayamung tanga tesem kati belener aotsüla. Onok visa tebilemtsü lir aser kasa mapang nung Covid-19 tensa-a asadangtsüla. India nung T20 World Cup masayatetsüsa kümra UAE nung asayatsü atema ICC-i sentong yangluogo," ta Mani-i ashi.

"ICC management-i, March 31 tashi nungbo telemtetba ka agütsü nungdaker ta shiogo," ta pai shisem.

## ICC Men's Test rankings: Rohit aser Axar na tejakdangi tuogo

**Tsüklai/February 28, 2021 (Agencies):** Tawa sayaba ICC Men's Test Player Rankings nung Rohit Sharma jenjang tibubai tuogo, koba pa indang career nung jenjang tjungtiba asütsü. England den Ahmedabad nung test asaya tasembuba nung kanga junga shilem agiba sülen pai iba jenjang ajangtetogo.

Mezüngbuba innings nung Rohit-i run (66) timtiba yanglu aser aser tanabuba inning nunga pai out mesüi run 25 yanglua teammate Cheteshwar Pujara nung ajatetogo. Pa indang rating points aggregate ya 2019 küm October ita 722 liasü aser tang point 20 agi timba küma 742 nguteta lir.

"Asaya akokba nung tongtibang shilem agiba sülen player of the match Axar Patel aser Ravichandran Ashwin nata tejakdangi tuogo. Left-arm spinner Patel-i tasembuba test nung wicket 11 agiba

sülen pa jenjang 30 tejakdangi tua jenjang 38buba tongogo aser off-spinner Ashwin-ia wicket tenet agi pa jenjang tasembuba nung lir," ta ICC sangdong ka ajanga metetdaksü.

"England spinner Jack Leach-i wicket pezü agiba sülen jenjang asem tejakdangi tua jenjang 28buba tongogo aser tang mezüngbuba top 30-i iogo," ta kasa sangdong ajanga metetdaksü.

Kasa mapang nung ICC-i ashiba agi, 2021 küm March ita nungi tenzük asayatem (tetsür aser tebur) ranking hopta shia update asütsü.

"Temelenshi ajanga rankings asadanga yimya nung mekongshitsü, saka asayamung ka (ODIs aser T20Is) mesera Test asaya ka tembangba sülen update asütsü. Ranking ya asayamung tasayadak nunga update asütsü akok," ta ICC-i ashi.

## **BILEMDANGANG**

**"Süngti lungti tajung nung tsüngi air."**